

Namik Karamustafić, geodetski tehničar



Dana 07.08.2020 godine iznenada je preminuo kolega Namik Karamustafić.

Rahmetli Namik Karamustafić, sin Hamdije, rođen je 20.02.1951. godine u Gornjim Vakufu. Osnovnu školu je završio u Gornjem Vakufu, a po završetku osnovne škole upisuje Geodetsku tehničku školu u Sarajevu, gdje je 1969. godine stekao zvanje geodetskog tehničara.

Po završetku srednje škole zapošljava se u Geodetskom zavodu Sarajevo i odlazi na teren u Banja Luku, gdje ga je zatekao veliki potres. Po dolasku u svoj rodni grad iz Banja Luke, zapošljava se 06.11.1969. godine u katastar općine Gornji Vakuf. U katastru općine Gornji Vakuf radio je kao referent i kao šef katastra, neumorno prenoseći svoje znanje i iskustvo drugim kolegama. Intenzivno je radio i kao sudski vještak za geodeziju, sve do odlaska u zasluženu penziju 2009. godine.

Porodični život je proveo sa suprugom Esmom sa kojom je imao troje djece - Ajlu, Tarika i Almu. Njegovim stopama je krenula kćerka Alma koja je postala diplomirani inženjer geodezije. Sin Tarik završio je Građevinski fakultet, dok je Ajla krenula stopama mame Esme, završivši studij Bosanskog jezika i književnosti na Univerzitetu u Tuzli.

Bio je veliki zaljubljenik u prirodu, skijanje, splavarenje i planinarenje. Savladao je mnoge uspone i vrhove diljem Bosne i Hercegovine i regije, na kojima bi mu pozavidjeli mnogi planinari. Penjao se na Maglić, Triglav, Čvršnicu, Prenj, Kozaru, Tatre i Velebit, splavario na Tari, Uni i Neretvi, skijao po cijeloj Bosni i izvan nje, ali najviše je volio skijati na Raduši. Kao istaknuti član i neko vrijeme predsjednik planinarskog društva "Goran Čišić" učestvovao je do zadnjeg dana u aktivnostima na izgradnji planinarskog doma „Rosinj“, čija je izgradnja i započela iz entuzijazma i ljubavi koju je zajedno sa svojim prijateljima gajio prema Vranici. Ljubav prema toj planini bila je neizmjenjena. Najviši vrh Vranice Nadkrstac bio je njegov zadnji uspon, a da je mogao znati, sigurno bi ga i sam izabrao.

Smrću našeg kolege izgubili smo čestitog čovjeka, a porodica uzornog oca i supruga, za čije ime se vežu brojni uspjesi. Krasile su ga puna kolegijalna otvorenost i profesionalna sposobnost. Mnogima je bio oslonac, uvijek spreman za dijalog.

Dženaza mu je obavljena 08.08.2020. godine na mezarju Mršića groblje, uz prisustvo velikog broja kolega, rodbine i komšija.

Neka je vječni rahmet našem Naki...